

بنات الليل



بتسرح بس ف الضلمة

وساعات ف النور

وتدخل عقلك النائم،

يبات سهران

وطول الليل تشاغل فيك

وتكتب والكلام يكفيك

وتوصل حبل أفكارك....

تقوم مفزوع

وتصبر ع المرار والجوع.

بنات الليل بتوهب لك..

سنين العمر

وتطلب أي شيء تلقاه

ف غمضة عين بدون أعمار

بنات الليل دي شغالة في ليل ونهار

بتغمز لك بطرف عيونها

تتسلطن ، قوام تجري تقول أشعار

ساعات.....

بتجيك الأوضة وتلبس لك على الموضة



وتتروّق وبتروّق مزاج معاليك

بنات الليل بتدعيك،

وتسأل ربنا يعينك

وتقبلها تعيش ف الدار

بنات الليل دي مش سافلة

بنات أفكار